



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :  Tir Yimyim

 tir_yimyim

 tir yimyim

TAPAK 8

**Ukraine den indang indanga
sensaksemtsü mulunga lir: Putin**

**Norwich-i coach Thorup
mapa nungi anentsüogo**

VOL. XXII ISSUE NO. 188 (ADOK 188) DIMAPUR RASEMNÜ WEDNESDAY RONGCHII (APRIL) 23, 2025 ₹ 5.00

CTAN aser NNQF-i Apr 24 nungi lungkak aitiba nung adentsü mepishir

Dimapur, April 22, 2025

(TYO): Department of Higher Education nung ochimashi anema lungkak aitiba manentsü ta Combined Technical Association of Nagaland (CTAN) aser Nagaland NET Qualified Forum (NNQF)-i metetdaksüogo.

Nagaland Cabinet-i April 21, 2025 nü Assistant Professors aser Librarians 147 absorption asüba meyipa reprangshitsü atema luden ka shimba sülen parnoki iba temepishiba agütsüogo.

CTAN aser NNQF-i yashi Cabinet lemtet magizüker ta metetdaksüogo.

Anogo asemnü timi lungkak aita aruaka asenoki akhangba onüktem magizüker, anungji tangatetba shita aliba sensotemi April 24, 2025 nungi lungkak aitiba nung shilem agitsü ayongzüker ta CTAN aser NNQF-i metetdaksü.

Brihostibarnep 9:00 ako meta Nagaland Secretariat, Kohima jakdang nungi Directorate of Higher Education tashi lungkak

aita jajatsü aser iba sülen mener lungkak aittsü ta parnoki ashi.

CTAN aser NNQF ajanga takhangba agütsüba onüktem rongnung faculty aser librarian posts 147 absorption asütsü temelaba agütsüba sorkar tetuyuba (No. HTE/HE/13-3/2020 (Pt-1) 104, dated 17 December 2024) meyipa agitsü dena lir.

Parnokisa June 6, 2016 sülen contract nung shimokba mapa ajak Nagaland Public Service Commission (NPSC) ket nung agütsütsü akhanger.

Cabinet-i regularisation asüba meyipa reprangshitsü tentetba Luden loksatsüla kechiyong iba ajanga mapang atsülanger aser iba luden tentetba ya ozüngi memelar ta CTAN aser NNQF-isa takhangba agütsür.

CTAN züngsemtemi Mongulbarnü Nagaland Chief Secretary nem ultimatum ka agütsütsü merang saka office nung maliasü, iba jagi parnoki asüng, April 23 nü agütsütsü ta osang angazüker.

Nagaland-i anogo ananü Pope Francis mangyim ayimer

Dimapur, April 22, 2025

(Agencies): Linük den külemi Nagaland nunga Pope Francis nem akhüm tetushi agüja Mongulbar nungi anogo ananü state mourning tenzükogo.

Iba mapang Nagaland ajungalen linük wako tom nung dang salatsü. Nagaland state sorkarisa Pope Francis den asüpila sentep sentong agiba anogo "one-day state mourning" alitsü metetdaksüogo.

State mourning alidang sorkar sentong kecha ayongzüka magitsü ta Home Department-i metetdaksü.

Pope Francis asüba ya Arogo ajunga atema masadangtetba takoksa ka lir ta Bishop of

Kohima, Nagaland Rev. Dr. James Thoppil-i ashi.

"Pope Francis ya atangji Tsüngremer nübortem asoshi sannüker ka liasü. Pai pa taküm piyong Osangtajung prokshiba asoshi bendanga agütsü, sensakertem aser tangar memenepertem atema noktak aser nübortem dang aria bilemtepsü, temeten agütsütsü aser alima meimtsü ayongzüka aru" ta Rev. Dr. James Thoppil-isa ashi.

Pai 2013 nungi 2025 tashi Arogo len ania aruba teti bilemtettsü. Pai yimjung yangluba aser linüktem tsüngda olemtep alitsü nung yaritepba teti bilemtettsü ta paisa ashi.

CNCII-i Apr 24 nungi lungkak aittsü ayonger

Dimapur, April 22, 2025

(TYO): Confederation of Nagaland Chamber of Commerce & Industry (CNCCI)-i state sorkar nem takhangba agütsüba pusema April 24 nungi mapang telatet makai dokan aser shishilembadak shibangtsü ayongzüker.

Iba mokdang nung temulungertemi shilem agi aser banking rejutem-a adentsü ta CNCCI-i metetdaksüogo.

Urban Local Bodies (ULBs) nung District Chamber of Commerce & Industry nungi teshimtet nübotem dendaktsütsü takhangba agüja

aser sorkari DCCI tem mezüngokba atema tejashi sayua parnoki iba lungkak aitiba sentong ayongzüker ta CNCCI chairman Dr Khekugha Muru-i sangdong ka nung ashi.

"CNCCI-i iba tebilemstü atema akokba tashi inyakogo aser chief minister dangia temepishiba shidi ka zülü aser April 20, 2025 tashi nung temeten magütsüra ozüngi melaba ama lungkak aittsü sangdongogo. Ajisüaka tesasatsüka state sorkar nungi telangzüba kecha mali" ta paisa ashi.

Anungji DCCIs 9 ajanga takhangba agütsüba den putepa

CNCCI-i mapang telatet makai 'voluntary business shutter down' tenzüktsü lemtet ta Muru-isa shisem.

Iba mokdang kübok medical services, petrol pumps, Taxi services, garitem, shisaliok rejutem aser sorkar office madentsü ta pai ashi.

Iba mokdang ya temulungertem atema lior aser DCCI ajaki timi lungkak aittsüsa mapa inyaktsü metetdaksür ta CNCCI chairman-isa metetdaksü.

April 25, 2025 nü CNCCI executive council senden nung tarutsü atema teinyaktsü lemtettsü ta paisa shisem.

State sorkar lemtet atema tenüngsang agütsür: NPF

Dimapur, April 22, 2025

(TYO): Nagaland sorkari contract nung inyaka aruba Assistant Professors 147 absorption asütsü lemtetba sota atatsü lemtetba atema tenüngsang agütsür ta Naga People's Front (NPF)-i metetdaksüogo.

Iba lemtet ajanga kaketshirtem, civil society organizations aser sendaktepa alirtemi sorkar mapa nung timi

aser lateta aliba inyakyim ajanga nisungtem anioktsü ola adokba angashiba sayur ta NPF-i ashi.

Sorkar mapa nung nisungtem shimokba inyakyim nung tashishitsü malitsü, timi inyatsü aser tajungtiba shimtettsü tangatetba NPF-i pusema nungiter. Sorkari sendaka aliba telok ajak den asüngdangteper ang lemtet tajung ka agitsü ayongzüker ta Press Bureau, NPF Central HQ-

i sangdong ka nung ashi.

Nagaland nung college balala nung contract nung inyakba tesayurtemi bendanga agüja shilem tulu agiba atema tenüngsang agütsür. Parnoki tenangzüka tajung ayuba aser tenzüka ajanga shisaluyimba jenjang tajungba kümogo anungji parnoki shilem agia aruba dena tarutsü nung lemtet tajung ka agitsüla ta NPF-isa metetdaksü.

Konyak Students' Union-i Minister Along aitsür

Dimapur, April 22, 2025

(TYO): Higher Education Minister Temjen Imna Along-i pa jenbutsü atema Wangkhao Government College tenüng amshiba aitsür ta Konyak Students' Union (KSU)-i metetdaksüogo.

Assistant Professors 147 aser librarian ka regularize asüba atema Minister Along-i Wangkhao Government College tenüng amshia pa metentsü meranger ta KSU-i ashi.

Mon District nung higher education reju ka dang alibaji Wangkhao Government College lir aser Nagaland nung college

tejentem rongnung ka saka mapang talangka iba college nung tesayur peria maliba khuret ajangshia arur ta parnokisa metetdaksü.

Talisa Wangkhao Government College nung mapa lemozüktsüba professor tem tangaleni anienba ajanga khuret tuluba akümer saka parnoki Wangkhao Government College nungi dang itasenbo agizüka agir ta KSU-isa ashi.

KSU-i teaching posts tazüngtem nung nisungtem anioktsü takhangba agüja arur saka onoki kodanga ad-hoc mesüra contract nung

shimokertem regularize asüba pusema menungit ta parnokisa ashi.

"Ajisüaka contract nung inyakba tesayurtem regularize asüba nung ozü college tenüng amshiba atema pelar. Wangkhao Government College nung tensa ajuruba ajanga dang iba lemtet agi asü ta onoki sorkar dang asüngdanger" ta KSU-i ashi.

KSU-isa Nagaland ajungalen mapa inyaktsü bushirtem aser kaketshirtem den külemi noktakba aser regularization order meyipa agitsü takhangba agütsüba metetdaksüogo.



April 22, 2025 nü Naga Political Groups, Kin Hohotem aser Forum for Naga Reconciliation (FNR) Chümoukedima nung ajurutepdang agiba noksa ka angur. Iba senden nung parnoki Council of Naga Cooperation and Relationship (CNCR) maneni akangshitsü bangjemtep aser Naga nunger Putiotsü aser Yimtenren temetentem nung ajemdaker kati ka akhümtsübutepa külemi inyaksangshia aotsü mulungtepogo.

Patkai Christian College nung Earth Day amung



Dimapur, Rongchii/April 22 (TYO): Patkai Christian College indang Eco Club ajanga Earth Day nungtem nung April 22, 2025 nü Bundrock Chapel nung e-waste indang awareness sentong ka ayongzüka liasü.

Iba sentong ya Eco Club-i anir agi, kong shisalen sayur E-Circle Nagaland indang founder Sowete-u K Letro liasü.

E-Circle Nagaland ya state nung e-waste kanga junga anepalutsü nükjidong nung kumtetba lokti tentet ka lir. E-Circle Nagaland yagi e-waste bendena authorized recyclers dangi yoka e-waste ajanga libajen nung menentsüba ajemdaktsür aser rongsenketzüng nunga tajangzüik

alir.

Kaketshir den sensaksemba mapang Sowete-u ajanga E-waste statistics indang tongtipang onüktem rateta jembia aser alima nung e-waste timtiba adokdaktsüba linüktem rongnung India ya tasembuba jenjang nung lir ta ashi.

Electronic devices ama e-waste nung components balala lir, koba jana tokkendak tesem balala nung indokba ajanga nisung temang nunga timtem agütsür, ta lai ashi.

Lai 'linear' aser 'circular economies' tetsüngta indang rateta ashi aser sustainable practices amshitsü tongtipang ta ashi.

Circular economic system yagi jana-reja ajemdaktsüba

aser sustainability ajungketba nung rangloker, aser circular economy nung osettsüset tem tanaben yanglutsü, tanaben amshitsü mesüra shisa aotsüsa yanglur, anungji jana ajemdaktsür, ta lai ashi.

Anungji circular economy yimya amshiba ajanga e-waste agi libajen menentsüba ajemdaktsür, ta lai ashi.

Kaketshir nem e-waste management junga angatetdaktsütsü aser electronic waste ajemdaktsütsü nükjidong nung iba sentong ya ayongzüka liasü.

E-Circle Nagaland den teka amteper Eco Club, Patkai Christian College ajanga environmental awareness agütsütsü meranger.

Home Department-i April 30 nü shisadokden senden ka ayonger

Dimapur, Rongchii/April 22 (TYO): Home Department ajanga sangdong ka nung shisadokden senden ka April 30, 2025 anepdang 10:00 ako nungi tenzüka State Banquet Hall, Kohima nung amentsü metetdaktsü.

Iba senden nung jembitsü onüktem:

1. Road Development- with special reference to the construction of Foothill Road and Showba-Pangsa Road.
2. Free Movement Regime (FMR/ Protected Area Permit (PAP) issues.
3. Maintenance of Peace in the State in the wake of recent political developments.
4. Inner Line Permit (ILP) issues.

Iba senden nung Chief Minister, Deputy Chief Ministers, NLA Speaker & Deputy Speaker, Ministers ajak, Member of Parliament Lok Sabha, Member of Parliament Rajya Sabha, Advisors ajak, MLAs ajak, Chief Secretary den state sorkar indang ketdangsürtem alitsü.

Kasa senden nung tsinglanglen shia alirtem den teshimtet nisung asem-sem adentsü ayongzüker:

1. The President, Central Nagaland Tribes Council, Dimapur.
2. The President, Eastern Nagaland

Peoples' Organization, Hq. Tuensang.

3. The President, Tenyimi Union, Nagaland.

4. The President, Angami Public Organization, Kohima and the President, Angamimiapfu Mechü Krotho, Kohima.

5. The President, Ao Senden, Mokokchung and the President, Watsü Mundang, Mokokchung.

6. The President, Chakhesang Public Organization, Phek and the President, Chakhesang Women Organisation, Phek.

7. The President, Chang Khulei Setsang and the President, Changsao Thangjam Setshang, Tuensang.

8. The President, Konyak Union and the President, Konyak Nyupuh Sheko Khong, Mon.

9. The President, Khiamniungan Tribal Council and the President, Khiamniungan Menyü Hoikam, Noklak.

10. The President, Lotha Hoho and the President, Lotha Elao Hoho, Wokha.

11. The President, Phom Peoples' Council and the President, Phomla Hoichem, Longleng.

12. The President, Pochury Hoho and the President, Pochury Mothers' Association, Meluri.

13. The President, Rengma Hoho and the President, Rengma Mothers' Association, Tsemnyu.

Association, Tsemnyu.

14. The President, Sumi Hoho and the President, Sumi Totimi Hoho, Zunheboto.

15. The President, United Sangtam Likhum Pumji and the President, Akehda Sangtamlarü Thsingmajang, Kiphire.

16. The President, Tikhir Tribal Council and the President, Tikhir Women Organisation, Kiusam.

17. The President, Yimkhiung Tribal Council and the President, Yimkhiung Women Organisation, Shamator.

18. The President, Nagaland Zeliang People Organization and the President, Zeliang Mipui Organisation, Peren.

19. President, Naga Hoho.

20. The President, Naga Mothers' Association.

21. The President, Eastern Nagaland Women Organization, Tuensang.

22. The President, Central Nagaland Women Association, Dimapur.

23. The President, Global Naga Forum.

24. The President, GBs Federation, Dimapur, Nagaland.

25. The Convenor, Forum for Naga Reconciliation.

26. The President, NPMHR.

27. The President, Naga Council Dimapur.

Nokpu aser Saring yimtsüng nung World Earth Day amung



Dimapur, Rongchii/April 22 (TYO): World Earth Day nungtem nung Nayi Kiran Trust ajanga Nokpu kaketshir den lungjemer Nokpu aser Saring Village Councils teyari nung awareness sentong ka April 22, 2025 nü agia liasü.

Iba sentong ya Nayi Kiran Trust ajanga sponsor asü aser Nokpu aser Saringyim nung agia liasü.

Iba anogomung nung shilem

ka ama arem shiruru aser libajen wazüka ayutsüba indang posters tem yimtsüng ana sendaktepba lenmang nung yua nüburtem dang arem shiruru aser libajen wazüka ayutsü ajungmesoa liasü.

Iba sentong nung Moalemba menden liasü aser SBA Women Pastor Nukchala Longchar-i sarasadema tenzüik.

Iba sülen Nayi Kiran Trust tir Lanusungkum Longchar aser

lokti tentet balala lenirtemi arem shiruru aser libajen wazüka ayutsü nungdakba aser tarutsü asoshi arok mapa indang lemsatepa liasü.

Nokpu Village Council chairman Sashimeren-i melepzüng o jembidang, Nayi Kiran Trust ajanga tongtipang mapang ka nung iba ama sentong ayongzüka asoshi pelaba lemsatepa liasü aser sarasadema sentong tembang.

Home Department-i mangyimtsü sangdonger

Dimapur, Rongchii/April 22 (TYO): Supreme Pontiff of the Holy See, Pope Francis, April 21, 2025 nü asüba asoshi pa nem akhum agüja aser linük ajunga den külemi Nagaland nunga tesem ajunga nung 'State mourning' alitsü Home Department ajanga sangdongogo.

April 22 aser 23, 2025

anogotem State mourning alitsü aser pa den asüpila agiba anogo nunga anogo ka State mourning alitsü.

State mourning mapang Nagaland tesem balala nung teti songa aliba National Flag ajunga tom nung atsüzüksü aser iba mapang 'official entertainment' kecha malitsü, ta sangdong ajanga ashi.

Jalukie ADC den tepila sentong agi



Dimapur, Rongchii/April 22 (TYO): Additional Deputy Commissioner, Jalukie, T.L. Kiusumong Tikhir den tepila sentong ka April 22, 2025 nü Additional Deputy Commissioner, Jalukie indang office nung agia liasü.

Iba sentong nung EAC Jalukie, Sizin Renttah menden liasü.

Sentong nung T.L. Kiusumong Tikhir ajanga tepila o jembidang, pa atema tepila sentong tajung ayongzüikba atema par establishment nungi ketdangsür aser staff tem dang pelaba lemsatepa liasü.

Pai Jalukie nung temulung süa aser tangazükba jenti ngua liogo ta ashi aser pa mulungjang nung tajangshiba tajung bener aor ta ashi.

T.L. Kiusumong Tikhir-i sub-division nung department balala nungi ketdangsürtem, lokti tentet

balala, town councillors, GBs, VCCs, tetsür aser lanur lokti aser nisung balalai pa ADC Jalukie inyakdang tanen makai yaritepba aser amalitep akaba atema pelaba lemsatepa liasü.

Team work ajanga dang sub-division nung ken o balala tajungtiba nung bentetogo ta ashi aser sub-division tejakleni aotsü atema ADC tasenba den kasa yariteptsü ayongzüka liasü.

Iba sentong nung sub-divisional level officers balala, lokti tentet lenirtem, town councillors, tetsür aser lanur lokti nungi lenirtemi o tatsütsü jembia T.L. Kiusumong Tikhir dang pelaba lemsatepa liasü.

T.L. Kiusumong Tikhir ya Jalukie indang ADC ama inyakdang nübur ajangzüksü mapa jenti inyakogo, ta parnoki ashi aser ketdangsür ya mapa tajet, ajemalu aser teindang ketdangsür ka lir ta shia liasü.

ENNWA ajungben senden nung mendenpur tasen shim

Dimapur, Rongchii/April 22 (TYO): Eastern Naga National Workers Association (ENNWA) pur ajungben senden ka April 21, 2025 nü Khehoi Designated Camp nung mena liasü.

Iba senden nung teloki ENNWA mendenpur tasen shimtsü pangjem aser ajaki mulunga 2025-2028 kümsük atema kilonser N. T Yamthong mendenpuba aser F Pongba Konyak tezüluba asütsü shima liasü.

Parnokisa tir Maj (Red) R M. Lotha aser ato kilonser N. Kitovi lenisüba nung yaritepa aser külemi teka amteper inyaktsü pangjemshia liasü.

April 18, 2025 nü sangdong ka nung 'Government of India aser GPRN/NSCN (N.Kitovi) tsüngta Ceasefire Agreement zülutepba ya tejangja masü aser

Eastern Naga territories nung mamshir' ta media nung prokshiba iba senden nung aitsü aser ENNWA ya telok balala kübok linük tenzüker ajungai amshiteter asünung telok ka kijai kibur kuma mamshitsüla, kechiaser iba yagi ENPO nüburtem temulung yirutsütsü aser iba sangdong nung 'political reasoning' maliba sayur, ta pangjem.

Ceasefire Agreement züluteptsü atema Government of India-i N. Kitovi telok jaok, anungji pa teloki Ceasefire ground rules nung aliba ama Nagaland tesem ajunga nung inyaktsüla, ta pangjem.

ENNWA ajangasa yimjung meimba nüburtem, talisa ENPO region nung alirtem dang nübur mashi lenmangi anisatsüsa sangdong agütsüba saksalema meita atatsü ayongzüka liasü.

J&K nung kiralongrartemi alima penzürtem aika yirutsü



Jammu and Kashmir kübok Anantnag district nung Pahalgam tesem kiralongrartemi amakba sülen security personnel tem iba tesemi aritepa oa liasü. Iba lendong nung nisung 12 yirua liasü.

New Delhi, Rongchii/April 22 (Agencies):

Kiralongrartemi Jammu and Kashmir nung Pahalgam kübok Baisaran tesem amakba sülen alima penzür 12 yirua liasü. Osang ajang ashiba agi, yirur alirtem rongnung nisung ana temang kanga mejungi lir.

Jammu and Kashmir nung Pahalgam kübok Baisaran valley nung prangbong akhaba ola angashiba sülen security forces tem iba tesemi aritepa oa liasü, ta police-i Mongolbarnü ashi.

Osang ajanga ashiba agi, alima penzürtemi kanga sapua semdangba tesem ya kiralongrartemi maka liasü, ta parnok i ashi. Iba lendong ya nokongtsütsü 3 ako meta ataloka liasü.

Security forces iba tesemi ogo aser meita aoba sentong

tenzükogo, ta PTI sangdong ka ajanga metetdaksü.

Tenük kuli agütsürtemi ashiba agi, mejangjaba nisungtemi alima penzürtem dak injang khaloktsü aser iba ajanga nisung aika yirua liasü.

"Kübuba tekolak nung akha aser ano nisung aika yiruogo," ta tetsür kati PTI dang phone ajanga ashi.

Iba tesem ya tetsüng agi aser kor nung mener dang oteter, ta ketdangsürtemi ashi.

Yirur alirtem anintsü atema ketdangsürtemi chopper ka yok ta ketdangsürtemi ashiba den yirur alirtem ya karbo iba tesem nung alirtemi parnok indang kor nung anir alua liasü, ta shisem.

Kasa mapang nung BJP lenir Ravinder Raina-i ashiba agi, iba tesem ya Pakistan nunger kiralongrartemi amak aser aibelena alirtem merenshitsü.

"Pakistan nunger kiralongrartemi Pahalgam nung alima penzürtem makogo. Tasümait Pakistan nunger kiralongrartemi tasü tait Indian Army, Jammu and Kashmir Police aser paramilitary forces tem denbo mekhatepteter. Iba tasümait kiralongrartem yagi hadir kecha bena maliba tai maketba alima penzürtem makogo, shirnok Kashmir semdangi aru. Alima penzürtem karbo local mozükitemi anirogo. Iba tesem ajunga Army aser police-i meketbangogo. Kiralongrar shirnok aibelena lir aser parnok nem teyari agütsürtem merenshitsü," ta Raina-i ANI dang ashi.

Taoba Chief Minister Mehbooba Mufti-ia X ajanga Pahalgam amakba aitsüogo aser ken o kanga junga bushisüngdangtsü ayongzükogo.

Atishi indang security cover category ajemtsütsü tuyu

New Delhi, Rongchii/April 22 (Agencies): Ministry of Home Affairs (MHA)-i Mongolbarnü Delhi Police dang taoba chief minister aser AAP lenir Atishi indang security cover category ya "Z" aliba nungi "Y" kümtsütsü tetuyuba agütsüogo.

Atishi indang security cover jenjang dak sendakba nung Delhi police indang security unit-i ministry dang asüngdangba sülen iba tetuyuba ya agüja liasü. Delhi police-isa, AAP national convener Arvind Kejriwal indang security cover indanga asüngdangogo.

Atishi amokmerenba indang central agency temi asadangogo aser la tangbo amokmeren kecha mali ta ngutetba sülen "Z" category security cover agütsütsü nüngdak madoker, ta ketdangsür kati ashi.

"Ministry-i mezüngbo Kejriwal aser Atishi naprongla indang security cover memelenshitsütsü asüngdang saka mapang tatsüka lir Delhi Police dang Atishi indang cover ya 'Y' category kümtsütsü tuyua liasü," ta ketdangsür yagi shisem.

"Y" security category-i aluba sülen Atishi nem Delhi Police nung commando ana densema sepai 12 shi-i tekümsükba agütsütsü. Maneni la nem la indang convoy mintsü atema pilot vehicle amala maongka kar magütsütsü.

MHA tetuyuba nung central intelligence aser security agency temi Yimden yimsüsürtem amokmerenba asadangba sülen security agütsür. Chief minister akümba sülen Atishi nem "Z" category security agüja liasü.

February 5 nü Delhi election nung AAP pur tamakok anguba sülen AAP MLA temi la legislative party lenir asütsü shim aser iba sülen la assembly nung opposition lenir aküm. Atishi-i Kalkaji constituency nung BJP candidate, Ramesh Bidhuri koka liasü.

March ita Delhi Police-i, taoba Delhi deputy chief minister Manish Sisodia, AAP MLA Ajay Dutt, aser taoba Delhi Speaker Ram Niwas Goel nunger nem 'Y' category security agüja aliba agintsü benoka liasü.

Mamata-i tesayurtem dang mapai meyipa aotsü mepeshi



New Delhi, Rongchii/April 22 (Agencies): West Bengal chief minister Mamata Banerjee-i Mongolbarnü, longkak aita aliba tesayurtem dang parnok mapai meyipa aotsü mepeshiba den lar sorkari parnok itasen kümzüka toktsütsü ta tenangzükba agütsü.

Pai tenangzükba agüjaka tesayur meyirejang aika shirnok tawa Supreme Court-i parnok indang appointment thija liasü, parnok maneni Salt Lake nung West Bengal School Service Commission (WBSSC) office kima longkak aitar.

"Shirnok aibelena ali mesüra mali iba indang shisabulutsü nüngdak mali. Nenok mapa atema mesüra itasen mapang shitak nung angur mangur iba indang dang tebilemtsü ka-ang. Aibelena aliba aser maliba tesayurtem indang list sorkar

aser court tem ket nung lir," ta Mamata Banerjee-i Midnapore nung administrative sentong ka nung asiba PTI sangdong ka ajanga metetdaksü.

"Nenok mapa tang atemabo kümzüka lir aser nenok itasen angutsü. Yimlibilema nenok school-i meyipa oa class tem tenzükang. Ni iba indang yasüng aiben jembiogo. Onok nenok den dena lir," ta Banerjee-i shisem.

Trinamool Congress lenir yagi ashiba agi, Group C aser Group D staff shirnok mapa maka kümogo parnok atema review petition ka Supreme Court nung benoktsü. "matalok tashi onok dak tamang ka-ang," ta lai ashi.

Banerjee-isa, lai Murshidabad nung mepetmesü adoker aliba tesemtem May ita mezüngbuba hopta semdangtsü, ta ashi.

Karnataka police-i taoba DGP Prakash tepsetba bushisüngdangdar

New Delhi, Rongchii/April 22 (Agencies): Karnataka Home Minister G P a r a m e s h w a r a - i Mongolbarnü ashiba agi, taoba Karnataka DGP Om Prakash kechiba tepset iba ken o aser tanga ken o tejangja metettsü atema Central Crime Branch (CCB)-i bushisüngdangdar.

Osangbenertem den sensaksemba mapang pai ashiba agi, police-i pa kinungtsü Pallavi puatokogo aser lai pa tepsetba nangzükogo.

"Bushisüngdang maneni südar aser CCB nem

bendanga agütsüogo, kechiyong pa (Om Prakash) ketdangsür tejen ka liasü," ta Parameshwara-i ashi.

Pa indang mobile phone nungi kecha osang ali mali ta asüngdangba mapang pai memetet ta langzü.

"Item ajak ya bushisüngdang mapang asadangtsü," ta pai ashi.

Taoba Karnataka police tekolakba ya Deobarnü yimti kübok posh HSR Layout nung par kidang sür lia nguteta liasü.

Police sources-i ashiba agi, Om Prakash aser kinungtsü na

anepdang chiyongba mapang asatepba sülen mangatettep taliba küma pa tepseta liasü.

Par jala, Kriti-a iba lendong atalokba mapang kidang liasü, ta parnok i ashi.

Om Prakash'er jabaso, Karthikesh-i tashishiba ka benokba sülen HSR Layout police-i ken o benoka liasü. Paisa, tetsü aser pa adianu naprongla ya depression agi timtema liasü, ta ashi.

Iba ken o nung Kriti sendaka ali mali aji police-i jangjatsü merangdar aser la tang tashi mepui lir.



New Delhi nung Waqf (Amendment) Act, 2025 anema All India Muslim Personal temi ayongzükba Save Waqf Conference nung AIMIM tekolakba Asaduddin Owaisi aser tanga Muslim nunger lenirtemi shilem agiba noksa nung angur.



TIR YIMYIM YIMOBILEM (EDITORIAL)

DIMAPUR WEDNESDAY, APRIL (RONGCHII) 23, 2025

Ajak dang meimsang putir !

Rome lima Vatican yimti nung Catholic arogo yimten madak temaba putir Pope Francis arishi küm 88 nung asüba ya ajungbena atalokba kabo masü, kechiyong pa ya taoba ita tashi temang mejungi kümer mozü kidang tasütsü mapang atar amai kenbo anepalua liasü. Ajisüaka, pa junga kümer yakanü Yisu Khrista shia aruba anogo bilemteta amongba Easter anepdanga pa alidak St. Peter's Basilica nung adok agi nübortem nem temoatsü agüja sarademja liasü. Iba sülen tanünepbo pa alimai nungi pilaa adok. Pa temang nung tashi mait liaka, pai taoba hopta nung US tadong tir JD Vance-bo ajurutsü mela. Aji oda, alima yimten lenirtem rongnung Pope Francis taküm lia tesüsaba ajurubaji JD Vance asütsü südi. Pa süli, Vatican sangdong ka nung, " Yisu sülen anidaker shitakba nütsüng ama, pai tatishitsü tajung yutsüba asoshi tepela nung, onoki Pope Francis tanela Tsüngrem ka nung asem masadangtetba taochi aser temeim nem agütsür," ta metetdaksü. Aji oda, Pope Francis süli alima kin balala nungi mangyim jashi lemsatepba osang metetdaksür rongnung US tir Donald Trump liasü. Ajisüaka, pai oren tongmelang ka agidang, " Pope Francis tesünep nung anisüngzü kangma ! Tsüngremi pa aser pa dang meimertem ajak moajang !" ta dang metetdaksü. Iba mangyim jashi lemsatepba o nungji kecha tai mali saka kuli küpdok o amai ka dang aikati angateter. Aji oda, Pope Francis taküm aliba mapang Donald Trump tena yimten maparen tongtibang kar nung tangatetba balala liasü. Donald Trump-i US nung ozüng alema aita alir bendanger ayangertem anema kanga sashia jembi aser putender aridoker , saka Pope Francis-i item ama teküpbok jenjang nung alirtem dang taochi sayutsü ajungshi. Ibaji dang masü saka Pope Francis 2013 küm temaba putir menden nung amenba sülen alimai agizüktettsüsa Catholic tamangba yimsü aser yimten inyakyim nung temelenshi tajung aika bener arutsüaka, ajakibo magizüktet nemnema mapa kaji, pai tetsür o tetsür na aser tebur o tebur na apuani süa kibong akümba nung Catholic putirtemi temoatsü agüja sarasademtsütsü melaba mapa liasü. Ano, Pope Francis-ibo alima nung tamangba yimsü kecha maitsü saka ajak dang meimtepa alitsü sayu. Iba jagi, tanüa pa sür külen Gaza nung Muslim nungertemi aser India nung Hindu nungertemi pa mang ayimer. Paibo Israel nungertemi Gaza amakba mapa aitsü aser aiben Palestine nunger pusema jembi. Ashiko, iba jagi balaka Israel nung Yihuda nungertemi Khristan-tem sempatsü tenzük südi aser Gaza nung Khristan-tem dang taochi mesayui inyak südi. Iba ama arogo aser yimten inyakyim nung Donald Trump den dang masü saka par Catholic arogo nung lenirtem dena meputeptettsüsa Pope Francis-i telemtetba agibatam karbo liasü. Ashiko, item ajakji pa dak temeim aliba ajanga inyakba asütsüa akok, kechiyong pai pa sülen anidakertem dang sensakertem aser balalulartem dang-dang masü saka nisungtem rongnung atsü-aponng kasa den medemertem danga meima parnok lokti aser arogo nung agizüka amshitsü asoshi temelaba agütsü. Iba jagi, pai sayuba agizükertemi pa dang Yisui sayuba ama ajak dang taochi sayua temeim mapa inyakogo ta kuli agütsü südi. Atangji, pa dang masü saka pa jakdang inyaker Catholic putirtem daka tetsüng metsütsüsa atalokba ken o angashia aruogo. Ajisüka, item ajakji toktsür, alima nung Khristan-tem rongnung Catholic teloki temeim mapa inyakbatembo tanga Khristan teloktemi madoksatsü. Catholic purtemi mamangba purtem dang Khristan akümtsü atema tebang agi mashir saka parnok nübortem rongnung lia temeim mapa inyak tenzüker aser temeim mapa agi nisung mulungjang akoktsü meranger. Atangji, Laishiba tesayubajia aji dang, kechiyong Yisui asenok dang temeim mapa inyaktsü sayu aser Tsüngremji Temeim ta Laishibai sayur. Ashiko, meimnüyonga Tsüngremi latettsüba sobaliba aser inyakyim anema inyakerter dangbo temeim sayubaji tashiochtsü asütsüa akok. Pope Francis-i aji benteta nisungtem dang meimlasang, temeimji pei inyaknütsü inyaktsü asoshi masü saka Tsüngrem temeimi sayuba ama meimteptsüabajing shitaka ta alimai tajungba angatetla. Iba temeimji jembidang, atangji, alimai Pope Francis bilemtettsü.

OLEMSABANG

LENNIR TAJUNGI NÜBUR OLA ANGAR ASER NÜBUR NUNGI SHISATSÜ AGIR

~ L. Kika Pongener.

Asenok ajaki metet, tanü asenok aliba putu ya kechisarena ajak nung kanga kara-a melenshia aoba putu ka lir. Ajioda, koba tashika melenshia renloka aor, patakaji yanglushia melenshitsüsa, metok-meperi aser mabensabaji adokjen adoker. Anungji kechi mapa sudir suaka, kechi inyakogo aji tatem, joko iba nungji kecha temelenshitsü malia ta nisung kari tangatetba lira, ajibo melenshinung ajungtsü. Ken o nung asüyongjia kechi lemtetogo aji telemtet, ibaji tatempang aji memelenshitsü ta tangatetba shinga daka malitsüla. Kechi mapa inyakdir inyak-aka, asen pei jurila atema inyaker sura ajibo pei mulong, saka yimden, arogo, mungdang aser lokti atema inyakba mapa ka sura, ajibo tamasa tenzükdangyongi lenla ajunga nungi shisatsü agir-ang tenzüka inyaktsüla. Koba lokti nung sudir suaka, lokti anitsü asoshi temzüng-ozüng (Rules and Regulation) aser inyakyim leniba (Guide-line) lateta yua lir, aser iba nungji ajemdaker lokti kaji anir. Lokti nung lennir shiba sudir suaka, iba temzüng-ozüng aser inyakyim leniba küpokji litettsüla aser tashi anga-a anidaktettsüla. Lennir shibai iba küpokji meliteter pa/la dangji lennir tajung ta majatsü. Lennir tajung kati lokti temzüng-ozüng aser inyakyim küpok tashi angaa liteter. Lennir tajungi pei madak lennir dang akümtsübur aser pei madak lennir küpok tila küma liteter.

Ano lokti nung lennir ajaki kechi mapa inyakdir inyak-aka, pei nuja jurila atema masü, saka lokti atema inyaker asünungji, nubur ajaki mulonga agizüktettsü asü magizüktettsü...??? ta nubur nungi shisatsü agia inyaktsü kanga tongtipang lir. Kechi mapa sudir suaka, lokti atema inyakba mapa ka nung, nuburi temulong masütsüsa sura, khien kanga junga shisadanger, melenshia yanglushitsüla. Kechi ken o telemtetba agidir agiaka, nuburi magizüktetra tashiyim agi atsür aotsü memerangi, khien meyipa reprangshitsüla. Ano temalen shiyunga aruba amaji, tanü asenok ya tashitemeteter agi sunga aliba putu ka nung alir asünung, lokti nung tenzüker shiaji pei pei yari temetetba aser tangatetba tila-kabosa amma lir. Anungji lennir shinga-ia pei bilemba aser pei-i angatetba kisung nung lokti ka anir aotsü memerangtsüla. Ano lokti ajungtsü asoshi mapa tajung ka inyakdang, mesura ken o kar telemtetba agiba nung, iba mapa jagi aser telemtetba agiba jagi nubur tsüngda nung mepetmesu-ang adoktsüsa sura, mesura ken o bulutsüsa sura khien kanga junga shisadanga meyipa reprangshitsüla.

Lennir ajaki kanga junga angatettsübaji, lokti mapa inyaktsü telemtetba agidang, külem tenzüker ajak nungi pei pei tebilemba aser tangatetba lemsateper külen, aroki mulongba nung telemtetba agitsüla. Ano kangasa tongtipang kaji, lennir ajaki nubur taginuba ola anga-a loktiji anitsü merangtsüla. Kodang lokti nung lenniri pei kija mulongba kisung agi loktiji anir aotsü merangdir, lenmang aisu nung tetsükdaksü ajurutsü, kodanga takok mangutsü, lokti nung ken o bulutsü aser mapang kar nungpo maaksua ajurutsü. Anungji lennir ajaki külem tenzüker akümtsübu, kati ka züngshia tenzüksü kanga tongtipang lir. Tanü asen yimden, arogo, mungdang aser loktiliba ajak ya kijai tashi amshia yimsu asüba (Autocratic/ Dictatorship) yayim nung masü, saka nubur ajaki mulongba nung yimsu asüba (Democracy) yayim nung anir....Anungji ken o telemtetba ajak nisung ka kija mulongba agi masü, mesura nisung ishika (Syndicate) mulongba agi masü, saka külem tenzüker aser nubur ajak nungi shisatsü agia telemtetba ajak agitsüla. Mimchir asünung lennirtemi mapang kar nungpo aibelen inyaksemtsü akok....iba ama atalokdang nungsen metsübui indang-indanga timyim agi metongshiteptsüla. Ajiser, lennir jagia aibelenbaji hau ta agizüktettsüla, aser metongshitsübaji pelaseta agizüksüla. Shirnoki temetongshitsüba pelaseta agizüker parnok dangji tashitemeteter ta ajatsü. Lennir tajungi külem tenzüker den angatettepa tenzüker, nubur ola angar, nubur nungi shisatsü agir aser nubur taginuba angateta lokti tenzüker aser anir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pope Francis ya cerebral stroke aser heart failure agi asü

Vatican City, Rongchii/April 22 (Agencies): Pope Francis ya cerebral stroke aser heart failure ajanga asü, ta Vatican doctor Andrea Arcangeli-i pa indang tasüba kulizüing kaket nung ashi.

Arishi küm 88 tain putir asüba indang kulizüing kaket Hombarnü sayaba nung pa coma nung mapang tatsüka lir Hombarnep asü ta shia liasü.

Francis ya "cerebral stroke, coma, irreversible cardiocirculatory collapse" ajanga asü, ta tasüba kulizüing kaket nung ashi. Roman Catholic Church otsü nung Latin America nunger mezüingbuba putir ya anepdang 7:35 ako (par mapang) nung Vatican nung aliba Santa Marta kidang pa indang takdang nung asü ta ashi.

Anogo ka tejakdang putir ya St Peter's Square nung Easter tekülem dak adener meyirijang aika ajurua open-top popemobile ka nung senzü aser teyariteper ajanga moaja liasü, koba pa atema tatembangba yimjak nung nokdakba alitsü.

Pa küm 12 putir mapa inyakba mapang aiben shiranga liasü aser tesüsa double pneumonia agi menepa Rome indang Gemelli University Hospital nung February aser March ita anogo 38 munga liasü.

Tasüba kulizüing kaket nung Francis ya arterial hypertension, multiple bronchiectasis aser type 2 diabetes agi kangshia liasü ta ashi, koba taoba mapangbo mesangdongi liasü.

Vatican ajangasa Francis indang tanülar tejembiba ka saya, kong pa ya Vatican nung aliba St Peter's Basilica nung masü saka Rome indang Basilica of St Mary Major nung remdaksünüba shia liasü.

Francis-i pa ali nung ki naro balaka meinoktsü saka pa indang leper long nung Latin oshi agi Franciscus ta zülur remdaksünüba shia liasü.

"Kü takum tatembang leni aruba ni meteta arur aser tatem maka takum aliba nung tamang yur, ni aremtsüba indang kü taginüba renema yutsüner," ta iba zülu nung shia liasü, koba June 29, 2022 nung zülua liasü.

"Ni meimer aser ni atema maneni sarasademtsür ajunga nem Tsüngremi sempet talang agüjangma," ta ashi.

Vatican ajanga Hombar nikongdang St Peter's Square nung 'rosary prayer' agia liasü, koba putir sür yimjak nung pa bilemteta agiba sentong mezüingbuba liasü. Anü talui St Peter's Basilica indang archpriest Cardinal Mauro Gambetti-i anir iba sarasadem sentong agia liasü.

Francis asüba atema anogo toku mang ayimba ya Novendiale agi tenzüker.

Pa tasü mang ya putir sübotsü sübotsür St Peter's Basilica nung nüburtemi reprangtsü asoshi yutsütsü. Iba mapang alima tesem balala nung aliba Catholic arogo aser St Peter's Basilica nung anogoshi sarasadem sentong aser Requiem Masses agitsü.

Vatican nungsa "sede vacante" mesüra "interregnum" ta ajaba transitional period kati aitsü aser iba mapang tashi ya College of Cardinals nem agütsütsü saka papacy ka meshim tashi tongtipang telemtetba kecha magitsü.

Anogo 15 nungi 20 tsüngta arishi küm 80 kübok cardinals tem Vatican City nung aliba Sistine Chapel nung adenshitsü aser iba tesem ya shibanga

ayutsü aser secret ballot ajanga putir tasen ka shimtsü. Putir shimba sülen chapel indang chimney nungi mokozü temesüing adoktsü.

Kasa mapang Pope Francis indang asüpila sentong ya Honibarnü agitsü, ta Vatican ajanga sangdongogo.

Cardinals tem iba asüpila sentong asoshi renemtsü atema senden ka tenzüker mapang tatsüka lir iba asüpila sentong ya Honibar anepdang 10:00 ako (par mapang) nungi Rome nung aliba Basilica of Saint Mary Major nung agitsü, ta Mongulbarnü sangdong.

Asüpila sentong yanglutsü aser temelener shimtsü asoshi renemtsü atema Rome nung aliba cardinals ajunga senden kati jaoka liasü.

Francis indang tasü mang ya Bodhbarnep 7:00 ako nung nüburtem nem reprangdaksütsü asoshi St Peter's Basilica-i bener aotsü, ta sangdong ajanga ashi. Tang tashi pa tasü mang ya Santa Marta residence nung aliba chaple nung tasü mang süngden ka nung yua lir. Vatican ajanga sangdong ka nung ashiba agi, camerlengo of the Holy Roman Church, Cardinal Kevin Joseph Farrell-i anir sarasademtsü aser iba sülen süngden ya Basilica-i bener aotsü.

Iba sülen camerlengo ajanga langpang nung sentong agitsü asü tatemi nüburtemi Pope Francis tasü mang nem akhum agüja sarasademtsü akok.

US Tir Donald Trump aser aser Pope Francis linük, Argentina Tir Javier Milei nunger densema alima nung lenirtem aser chuba tem pa asüpila sentong nung adentsü renemtar.

ANOGO ABEN TSÜNGREM DEN

Taochi aser Tesünep

"Asen Tebu Tsüngrem aser Kibuba Yisu Khrista nungi nenok dangi taochi aser tesünep süang."

-Rom 1:7

Efesa nung arogo teku dangi züluba shiti shia "Nenok den taochi liang, aser asen Tebu Tsüngrem, aser Kibuba Yisu khrista taochi nenok den liang" ta tenzüker. Ibai Pauli taginüba o ka dang züluba masü, saka ochi temeim agi zülu. Ibai teti tesütep o talisa küm tasen ka tenzükdang ibai kanga tapet lir. Idaki ochi tulu asem dena lir, Tebu Tsüngrem, Kibuba Khrista aser tamangertem asoshi temoatsü. Asenok tesüngmangtsü mapang ka nung lidar. Mangashiba osang angashir, manguba oset angur, meimlaba tashidak agi nisung jenti asür, scientisttem raraba oset akidang meyanglutet aliba yangluteteta amshir. Alima kanga dang karaa melenshia aor. Telatet kecha maka kin kati kin ka raksatsütsü teraksatsüba tashi tait oset adoker. Iba ama lima ka nung alidang asenoki tarutsü jenokdak atema bilemer aser asenok temulung alemdakji Khrista tesayuba, tematiba Tsüngrem indang tesayuba nung anisüngzüker. Ibaji dang teperi masü. Iba dang tali tematiba Tsüngremji asen Tebu lir. Ajak Pai yanglu, ajak Tebu Pa asünung alima ajunga nung aliba meimchir tembar küma tesünep nung alitsü aji Pa nükjidong. Saka ano Pauli Khristaji kibur ta ashir. Tejen Lai Yihova aser Tasen Lai Kibur ta amshi. Tebu aser Techir kasa dang. Tetenzük Techir Tebu den liasü, aser Pa ajanga ajak yanglu. Kibubaji teti tatem maka Tsüngrem chir , shiba dak meimchir aria bilemba Tsüngrem ain alir. Pa otsü nung kibur. Pa chuba ka ama arutsü asenoki yongya atar. Pa kodang arutsü shingai memetet- Pa taküm küm arutsüa shibai metet!

Pauli taochi aser tesünep asenok nem agütsütsü sarasadem. Item o ana ya jangratemtsü otem lir. Yangji taochi tetezü Tsüngrem temeshi temeim asenok nem agütsüba lir. Tesünep tetezü junga aliba. Aiben asenok Khristanemi asenok shidakba nüngdakji mangateter! Sen kara , temaba jenjang nung lira, sempet tulu kara, mesüra anema lira, asenok junga alitsü ta aikati bilemer! Masü, asenok shidakba nüngdakji "taochi aser tesünep" lir. Tsüngrem tenüng sangang.

Kerala nung forest department-i kangki ka makepdoktsü

Thiruvananthapuram, Rongchii/April 22 (Agencies): Southern India nung Kerala nung aliba Catholic arogo kati ashiba agi iba state indang forest department ajanga kangki ka makepdoktsü aser par putir aser lenirtem anema arem li ozüing alema agia arur ka ken o benok.

Idukki district nung aliba St. Thomas Church indang parish priest, Father James Aikkaramattam-i April 21, 2025 nü UCA News dang ashiba agi, iba kangki ya arogopur kati küm aika tejakdang tenla agütsüba arogo li nung liasü.

April 12, Palm Sunday nü forest ketdangsür temi earthmover amshia meter asem talang concrete agi yanglua aliba kangki ya makepdoktsü aser ibai forest indang ali ozüing alema agiba lir ta ashi.

Forest ozüing nung aibelena temelaba makai arem telungi aitba aser sorkar meyong ali kimong tashiyim amshia agi ta tai tonglokja Forest department-i iba arogo putir densema nisung 18 anema ken o ka benok.

"Ni aser dangartem anema ken o benokba ya tiazü nung lir, kechiaser onoki kumzüka aliba

arem telungi mai. Arogopur ka iba ali nung ki yanglur küm 20 shi lir arogo nem tenla agütsü. Iba ki ya registration number lir aser electricity connection lir," ta putiri ashi.

Iba ali indang pattayam mali, ta putiri ashi, koba ajanga iba ali nung alu ayimtsü mesüra alitsü asoshi nisung ka nem temeden agütsür.

"Yamaji district nung kibong noklang aika alir. Kangki agentsüba nükjidong ya yangji ali kibur temeden makai alir amokmerentsü asoshi lir," ta Manoj Mamala-i ashi, shiba parish council member aser ken o nung pa tenünga densema lir.

Onoki ner arogo dak yamai inyaktetera nenok ken o tamajungba asütsü ta shinerba lir, ta pai ashi.

Ali agia yangji alu ayimtsü asoshi sorkari ajungshiba ama yangji aliba nüburtem timba central Kerala nungi taoba century nung aru. Sorkar indang inyakyim aser ozüing tem melenshiba ajanga nisung aika ali nung kibur ta sorkari magizüki kumogo, ta pai ashi.

Tatishitsü agi, iba arogo aliba tesem nung kibong 519 aliba nungi shilem asem dang

pattayam lir, saka nisung ajak yangji generations asem mesüra pezü lia arur, ta Mamala-i UCA News dang April 21 nü ashi.

Good Friday atongtsü lia arogopur tetsüing agi kangki alidangi jaja Way of the Cross sentong ayongzükbba mapang iba kangki ya indoktsü.

Forest ketdangsür temi iba tesemi aittsü nokdangaka arogopuri kangki indoktsür alidak ano khen atema kangki ka asong aser sarasadem sentong ayongzüker, ta Mamala-i ashi.

Ajisüaka forest ketdangsür

T.K. Manoj-i April 21 nü UCA News dang ashiba agi, "Ibai wazüka aliba arem telungi aitba ken o tejangja lir. Parnoki ozüing alema yangji kangki ka asong, anungji parnok anema ken o benok."

Ken o nung aitsürtem küm pongu tashi tepuokdak ayutsü, ta Manoj-i ashi.

Ketdangsüri tai tonglokja alirtem dang sorkar indang documents bener arua kuli sayutsü ashi. "Onoki official documents nung ajemdaker inyak, ali ya forest department meyong lir," ta pai ashi.

Iba arogo ya Eastern Rite Syro-Malabar Church kübok lir aser iba arogo indang Public Affairs Commission ajanga forest department inyaksangshi aitsü.

Nisung meyirijang aika iba amala ali nung alir, parnok alitsü ki, tekülem ki aser danga reju tem amenoker, ta commission ajanga April 17 sangdong ka nung shia liasü.

Nüburtem merenshia Khristanpur temulung yiruja kangki makepdoktsütsü melen sorkari land documents agütsütsüla, ta ashi.



Nagaland Conservatory of Music, Dimapur nung April 21, 2025 nungi April 25, 2025 tashi Choirmasters Conference 2025 tenzükogo. Iba sentong nung Conducting Methods & techniques, Voice workshops and laboratories, Music theory and analysis, ken aniba amala nung workshop aser seminar alitsü aser choral conducting master classes agia Hokulbarnü Nagaland Conservatory of Music nung community concert ka agia tembangtsü. Iba sentong nung Mizoram, Meghalaya, Manipur aser Nagaland nungi Music Directors aser Choirmasters 65 dak tema shilem agitar, kong shisalen sayur ya NCM nungi tesayur Lipokmar Tzudir, Tiakumzuk Imchen, Pfotokho Kayina aser Vini Assumi nungertem lir.

Netanyahu-i ozüing alema inyaktsü akhanger: Ronen Bar

Jerusalem, Rongchii/April 22 (Agencies): Ato Kilonser Benjamin Netanyahu-i pa jurila aser yimtenren tejangraba wazüka ayutsü nükjidong nung ozüing alema inyaktsü akhangba ama meinyakba yong mapa nungi anentsütsü merang, ta Israel itdangiter tekolakbai tai tongloksü.

Israel indang domestic intelligence service Shin Bet tekolakba Ronen Bar-i Hombarnü Supreme Court nem affidavit agütsüba nung iba o ya shia liasü.

Taoba ita Netanyahu-i Bar ya mapa nungi anentsütsü mera agiba bushisüngdang ka metembang aliba mechi court-i nokdang aser iba sülen mangatettep adokba yong

longkak ait tenzüka ato kilonseri democracy lendongi yoker ta aitsü.

Netanyahu-i tamang makatetba yong itdangiter tekolakba ya mapa nungi anentsütsü ta ashi, koba Hamas-i October 2023 nung amakba den sendaktepa lir ama angateter.

Ajisüaka November 2024 aser February 2025 tsüingta tatalokba balala aliba yong Netanyahu-i iba telemtetba ya agi, ta Bar-i ashi.

Netanyahu-i pa dang aiben Shin Bet ajanga Israel nunger sorkar anema longkak aiter, talisa longkak aiter nem senotsü teyari agütsür anema mapa inyaktsü imlar ta shia liasü, ta Bar-i court nem agütsüba nung shia lir.

Sübokrem amshiba, ashikülak mapa inyakba aser nüburtemi tamang makatettsüa inyaksangshiba densema tang ken o tejembidak aliba nung Netanyahu-i kuli magütsüdaaktsütsü nükjidong nung "security request" ka nung pai meyongnem agütsütsü memulung, ta Shin Bet tekolakbai ashi.

Gaza rara nung tetsüingtai ia yimjung ken o jembir Qatar aser ato kilonser indang office tsüingta senotsü tsütsü tesendaktep aliba indang Shin Bet ajanga bushisüngdangba mapang Netanyahu-i Bar atsüingdoktsü mera ya agia liasü. "Conflict of interest" agi menener iba bushisüngdang inyakyim raksatsütsü mechi Bar ya mapa nungi anentsütsü merang ta Netanyahu anemer

temi ashir.

Israel south tsütsü Palestine nunger telungpur telok, Hamas-i October 7, 2023 nü nisung 1,100 dak tema tepseta nisung 250 shi pua bener aoba indang tekumandangtsü jelia agütsüba sorkari senzüka yutsü ta temulung melemtetba nung ajemdaker Shin Bet yagi bushisüngdangba liasü.

Parnok nisung 50 dak tema tang tashi Gaza nung lir. Netanyahu aser par sorkar bhukumba hardline Zionist party temi ceasefire ka yanglua tanüingba nisungtem meyipa anir arutsü makoker ta aitsür.

Israel-i Gaza nung iba sülen amakba nung nisung 51,000 dak tema tepsetogo, ta yangji aliba Ministry of Health ajanga ashir. Netanyahu indang office-i Bar indang affidavit ya tiazü agi

sünga lir ta ashi aser mapang tatsüka lir Hamas-i Israel amakdang pai tamakok aludaktsü ta ashi.

"Qatargate" bushisüngdang mesüdaaktsütsü nükjidong nung Bar mapa nungi anentsütsü merangba masü ta ashi.

"Bushisüngdangba nokdangtsü atema anentsütsü merangba masü. Anentsütsü merangba nokdangtsü atema bushisüngdangba lir," ta ashi.

Ittangiter tekolakba atsüingdoktsü merangba aser maneni raraba ajanga sorkari Gaza nung pua bener oa aliba anir marutetba mechi longkak aitiba tali akumer.

Hamas-i amakba Shin Bet-i menokdangtet ta Bar-i agizükogo aser pa mapa nungi anentsü anogo yakta sangdongtsü, ta Hombarnü ashi.

Ukraine den indang indanga sensaksemtsü mulunga lir: Putin

Moscow, Rongchii/April 22 (Agencies): Russia tir Vladimir Putin-i rara tenzüker tang mezüingbuba Ukraine lenir Volodymyr Zelensky den indang indanga sensaksemtsü atema pai mulunga aliba temaitsü sayuogo.

Hombarnü Russian state TV den jembiba mapang Putin-i ashiba agi, Russia-i yimjung atema teti jangrabangra aruogo. Kyiv nung yimsüsürtemia kasaji bilemtsü ta amanger.

Kremlin otongdar Dmitry Peskov-i ashiba agi, Putin-i iba olen lemsatepba ajanga nüburtem aliba tesemtem mamaktsü atema Ukraine den indang indanga sensaksemtsü atema pai mulunga aliba sayur.

Putin-i iba tebilemba lemsatepba dak sendakba nung Zelensky-i indang indanga telangzüba magütsü, saka nüburtem kümzüka toktsütsü atema sensaksem asütsü asoshi Ukraine renema lir, ta ashi.

Russia-i 2022 küm February ita nungi Ukraine amak tenzüka sülen linük ana tsüingda rara tetenzüklen indang indanga sensaksemba dak alaka tang tashi nung indang indanga sensaksema mali.

Interfax news agency dang Peskov-i ashiba agi, "bilateral densema civilian target tem mamaktsü atema sensaksemtsü takoktsü lir ta tiri ashiba tetzü tiri Ukraine den sensaksemtsü atema bilema lir."

Zelensky-i aonungshia linük den jembir aser Hombar aonung ashiba agi, nüburtem aliba tesemtem amakba anentsü asoshi mulunga agizüktsü magizüktsü iba dak sendakba nung Ukraine-i Moscow nungi telangzüba tejangja ka nüngdaker.

Putin-i Easter anogo ghonda 30 atema cease fire benoka atatsü atema sangdongba sülen Ukraine nunger lenir yagi anogo 30 atema long-range drone aser missile tem amshia nüburtem

aliba tesemtem mamaktsü asoshi benokdangba liasü.

Putin-i, Kremlin-i iba onük ya asadangtsü ta ashiba den osangbenertem dang, civilian infrastructure facility tem mamaktsü asoshi benokba dak sendakba ken o ya bentettsü nüngdaker, ta shisem.

Putin-i, iba ita tetenzüklen Russia military-i missile amshia Sumy yimti nung nüburtem aliba ki ka maka nisung 35 tepsetba den nisung 100 dak tema yirurtsüba indang nangzükogo, koba taoba mapang khen danga nangzüka mali.

Russia-i missile khaloktsüba mapang Sumy yimti kanga mazüing liasü aser nüburtem Palm Sunday amungtsü atema yimtung nung adenshir liasü. Local congress hall ka nung medal ceremony ka ayongzüka agiba indang osang temai adokba sülen iba tesem deputy lenir mapa nungi anenja liasü.

Hombar aonung Zelensky-i ashiba agi, "civilian infrastructure mamaktsü atema benokba nungi Ukraine masetshi-i nokdaka lir, aser onoki Moscow-i telangzüba tejangja ka agütsütsü imlar. Iba ya ataloktsü atema sensaksemtsü asoshi onok renema lir."

Kasa mapang nung Russia-i amang sangwa metitemi tzüküm nung aliba Odessa yimti drone amshia amakba osang metetdaksüogo.

Ukraine, Bodhbarnü London nung US aser Europe nung aliba linüktem den sensaksemtsü lir. Taoba ita Paris nung lenirtem sensaksemogo, kong rara anendaktsütsü atema lenmangtem asoshi sensaksema liasü. Zelensky-i ashiba agi, sensaksem nükjidong tongtibangtibaji kecha nangzüktepba meyui ceasefire benoktsü asoshi lir.

US tir Donald Trump-i iba hopta tetenzüklen, Russia aser Ukraine na tsüingda iba hopta yabo tenangzüktepba ka yanglutsü imlaba lemsatep. Paisa, ken o tejakdangi bener mora sensaksem nungi atsüingintsü ta shia amokmerena liasü.

Lakhuni Baptist Arogo
P. O: Mangkolemba, Mokokchung
PELABA SANGDONGER
Mokokchung Ao Officer Telongjem (MAOT) ajanga Lakhuni Baptist Arogo nung 11th April 2025 ne Livestock Training on Integrated Livestock Farming, Transformative Industrialization Schemes, Skill and Jobs item onük nung ajemdaker yimti nüburtem nem angazükdakja liasü. MAOT nung lenirtemi iba sentong agitettsüsa tesayur tajung onok dangi yok nung kanga pelar aser Tsüingrem tenung asanger.
Sdl- Rev. Moaliba Pastor
Sdl- M. Bendang Longkumer Clerk

AOYIM SENSO MUNG DANG CHUMOUKEDIMA METETDAKTSÜR
Koda masüba maparen kar ajanga April 22, 2025 nü April 26, 2025 anogo nung Aoyim senso lenla mungdang alitsü ta alibaji taruba ita May 10, 2025 nung alitsü. Tesentepdak Tatar salang, Mapang 10 AM nungi alitsü.
Agenda kar lira ketdangpur ket May 8, 2025 tashi nung tongtsütsü metetdaksür.
Aoyim nung ali alir ajak aser telidak pur ajak metema arutsü senso menden ajanga metetdaksür.
Sdl- President
Sdl- Secretary

ALITAYOKTSÜ LIR
Aoyimti road touch, Highway nungi feet 500 yir. (left side)
@ 730/- Per sq.ft.
Contact : 6009905256

CHRISTIAN HIGHER SECONDARY SCHOOL
NYAMO LOTH ROAD, DIMAPUR - 797112, NAGALAND
E-mail: christian.dimapur@gmail.com
Website: www.chssdimapur.in

We design your child's future
IN LOVE AND
ADMISSION FORMS & PROSPECTUS

FOR CLASS 11 (ARTS & COMMERCE) 2025-26
FOR BOYS & GIRLS AVAILABLE AT THE SCHOOL OFFICE DURING OFFICE HOURS (9:00 am - 1:00 pm)

SPECIAL FEATURES

1. Qualified, Trained & Dedicated Teachers
1. Summer Bible School
2. Scripture Retreat & Counseling
3. Career Guidance Cell
4. Smart Board Classrooms
5. Hostel for Boys
6. Basketball Coaching (Affiliated with DBA)
7. Cricket Training (Affiliated with NCA)
8. NCC
9. Club Activities

NURTURING TOPPERS CONSISTENTLY

Laureus World Sports: Duplantis & Biles nati temaba tetushi angu



Rongchii/April 22, 2025

(Agencies): Otsü tasen aika yangluba pole vaulter Mondo Duplantis aser America tsür rongnungi nüngtugu gymnast Simone Biles nati Laureus World Sports Awards sentong nung temaba tetushi nguogo. Iba sentong ya Madrid nung agia liasü.

Duplantis nem World Sportsman of the Year naroküm aser Biles nem Laureus World Sportswoman of the Year Award agüja liasü.

Arishi küm 25 tain Duplantis ya pole vaulter tem ajak rongnung tajungtiba ta züngshir aser taoba küm asem tashi nominate asüba sülen pai tang mezüngbuba iba naroküm nguogo. Usain Bolt sülen track-and-field asayartem rongnungi Duplantis-i tang mezüngbuba iba naroküm nguogo.

Iba naroküm atema Duplantis-i, Spain nung Carlos Alcaraz (Tennis), France nung Léon Marchand (Swimming), Slovenia nung Tadej Pogačar (Cycling) aser Netherlands nung Max Verstappen (Motor Racing)

ajateta liasü.

Kasa mapang nung Biles shiba mapag tatsüka masayai lir asaya tenzükshia liasü, lai Paris Olympics nung gold medal asem aser silver ka ngua tang agi pezübenbuba Laureus award nguogo, koba Serena Williams den kasa lir. Tenapronglai kaka ngua liasü.

Nüngtugu tennis asayar Rafael Nadal nem pa professional tennis asaya nung anenba küm Laureus Sporting Icon Award agüja liasü.

India nung rongnungi Rishabh Pant, Laureus World Comeback of the Year Award atema nominate süa liasü saka iba naroküm ya Rebeca Andrade nem agütsü. Pa gari tsükokba lendong ka nung tasütsü nungi athiba sülen ita 14 lir asaya tenzükshiba sülen iba naroküm atema nominate asü.

Andrade, career tembangtsüsa aiben yiruba nungi meiyipa arur takok ngua asayaba atema la nem Comeback of the Year award agüja liasü. Andrade shiba ACL asemben tashi yiruba sülen

asaya nungi anentsü bilema liasü, lai Paris Games nung floor exercise nung gold medal ngua liasü.

Laureus Sports Awards 2025 takok angurtem:

- * Laureus World Sportsman of the Year Award: Mondo Duplantis
- * Laureus World Sportswoman of the Year Award: Simone Biles
- * Laureus World Team of the Year Award: Real Madrid
- * Laureus World Breakthrough of the Year Award: Lamine Yamal
- * Laureus World Comeback of the Year Award: Rebeca Andrade
- * Laureus World Sportsperson of the Year with a Disability Award: Jiang Yuyan
- * Laureus World Action Sportsperson of the Year Award: Tom Pidcock
- * Laureus Sport for Good Award: Kick4Life
- * Laureus Sporting Icon Award: Rafael Nadal
- * Laureus Lifetime Achievement Award: Kelly Slater.

Chelsea coach Maresca nem asaya ka atema tenokdangba agütsü



Rongchii/April 22, 2025

(Agencies): Chelsea manager Enzo Maresca, yellow card asem achiba atema England indang Football Association-i asaya ka atema tenokdangba agütsüba sülen pa Everton den kidang asayatsü aliba asaya nung shilem magitettsü, ta BBC-i

Hombarnü metetdaksü.

Arishi küm 45 tain Italy nung coach ya Deobarnü Fulham goal 2-1 agi akokba asaya nung Pedro Neto-i mapang apuloktsür asayaba mapang goal ka idaktsüba sülen tali benjungba atema yellow card chia liasü.

Iba asaya akokba sülen

Chelsea pur league table nung pongububai tuogo aser Champions League nung asayatsü atema maongka nguteta lir. Parnok Nottingham Forest dang nungi goal difference agi temaba jenjang nung lir.

Ajisüaka Forest puri Tottenham kokra parnoki Chelsea ajateta atutsü.

Maresca, shiba iba season yellow card ana chir liasü, iba card ana ya Newcastle aser Bournemouth den asayaba mapang chia liasü. Pa May 4 nü kidang Liverpool den asayatsü aliba asaya nungbo shilem agitettsü.

Honibarnü Stamford Bridge nung Everton den asaya nung assistant manager aser taoba mapang goalkeeper Willy Caballero-i touchline nung pa melen shilem agitsü akok.

Shooting World Cup nung India tasembubang nung tembang

Rongchii/April 22, 2025

(Agencies): Lima (Peru) nung ISSF World Cup tatembangbuba anogo trap mixed team event nung Prithviraj Tondaiman aser Pragati Dubey nati medal round tonga masayatetba sülen India nung shooter tem asembuba jenjang nung tembangogo.

Simranpreet Kaur Brar-i, India atema tatembangbuba medal Hombarnü women's 25m pistol event nung nguteta India team-i ajak senteper medal tenet ngua laisü. Kaur-i iba asaya nung silver medal angu.

Iba asayamung nung India team-i ajak senteper gold ana, silver pezü aser bronze medal ka ngua liasü.

USA-ia iba asayamung nung medal tenet angu, saka parnoki gold medal timba nguteta parnok tanabuba

jenjang nung liasü.

Team ajak rongnung China temaba jenjang nung liasü. Parnoki gold pezü, silver asem aser bronze medal trok angu.

India nung rongnungi arishi küm 18 tain Suruchi Inder Singh-i kanga junga asaya, shibai linük atema gold medal anaprongla ngua liasü.

Lai, Paris Olympics double medallist Manu Bhaker ajateta 10m air pistol asaya akok aser Saurabh Chaudhary den külemi temeyoktep asaya nung gold medal ngua liasü.

Hombarnü trap mixed team event nung Tondaiman aser Dubey na senteper point 134 ngua tena tibuba nung tembang aser India nungersa Lakshay aser Neeru nati point 128 ngua 13buba nung tembanga liasü. Temaba jenjang nung tembangba team pezü dang medal round-i ia liasü.

Norwich-i coach Thorup mapa nungi anentsüogo



Rongchii/April 22, 2025

(Agencies): Norwich City-i head coach Johannes Hoff Thorup mapa nungi anentsüogo aser taoba mapang Arsenal aser England midfielder Jack Wilshere nem tanungba asaya ana atema coach mapa bendaktsütsü telemetba agiogo. Arishi küm 36 tain Thorup ya 2024 küm May ita David Wagner melen shima liasü. shiba Canaries' play-off nung Leeds United makokba sülen mapa nungi anenja liasü.

Championship asaya ti nung trok nung tamakok anguba sülen Thorup mapa nungi anentsüogo.

"Mapang talangka atema inyakdaksütsüba dak rangloker shim ajisüaka tawa team-i junga masayatetba aser tamakok anguba asadanga sülen temelenshi bener arutsü nüngdaker ta bilemer," ta club indang sporting director Ben Knapper-i ashi.

Thorup lenisüba nung Norwich puri asaya 47 nungi 14 kokogo. Pa ya taoba mapang FC Nordsjaelland indang coach liasü. Pa indang assistant Glen Riddersholm-ia club toktsüogo.

Maneni Knapper-i, "tenaprongla nisung tajung,

shirnoki onok football club tejakdangi anir aotsü atema anibelem mesasai inyakogo. Tena pei pei career nung tarutsü nung takok nguyonga aotsü imlaja atar," ta ashi.

Easter hopta nung Norwich puri asaya anaprongla makok. Parnoki Portsmouth aser Millwall naprongla makok aser goal ti chia liasü. Parnok tang point table nung jenjang 14buba nung lir.

"Mapang tatsüka tsüngda nung bentettsüba kecha mali iba ya mapang agia bentettsü aser onoki telemetba agiba aser agitsü alibatem ajanga team tashi taitba kümdakja onoki asayanüba ama asayatettsü imlar," ta Thorup-i Hombarnü Millwall goal 3-1 agi makokba sülen BBC Radio Norfolk ta ashi.

Wilshere, shiba nem Tony Roberts aser Nick Stanley nati teyari agütsütsü, pa lenisüba nung Honibarnü Norwich pur Middlesbrough den asayatsü aser May 3 nü Cardiff den asayatsü.

Pa ya taoba küm October ita first-team coach asütsü shim. Pa taoba mapang Arsenal indang under-18 team manager liasü.

BILEMDANGANG

"Nai tangar peladaksüdang na tepelaba akümtsü."